

Ammasumik sulianut immikkoortiterineq ammasumik suliariumannittuussarsiuussisarnerni salliutinneqartarnissaat taamaalillunilu suliffiit sungiusarfiusut sapinngisamik qulakkeerneqarnissaat pillugit sanaartornermi neqerooruteqartitsisarneq pillugu Inatsisartut inatsisaat nr. 11, 2. december 2009-meersup UKA 2012-imut allanngortinneqarnissaanik Naalakkersuisut suliaqaqqullugit peqquneqarnissaannik Inatsisartut aalajangiiffigisassaattut siunnersuut.
(Inatsisartunut ilaasortaq Knud Fleischer, Kattusseqatigiit Partiiat)

Akissuteqaat

(Ineqarnermut, Attaveqarnermut Angallanermullu Naalakkersuisoq)

Aappassaanneerneqarnera

Sanaartornermut Avatangiisinullu Ataatsimiititaliaq siunnersuutip aappassaanneerneqarnissaanut isumaliutissiisuteqarneranut Naalakkersuisut sinnerlugit qutsavigaara.

Naalakkersuisut naammagisimaarlugu paasivaat, siunnersuutip itigartinneqarnissaanik Naalakkersuisut innersuussutaannut ataatsimiititaliami amerlanerussuteqartut tapersiisut.

Ikinnerussuteqartut oqaaseqaataat eqqarsaatigalugu inatsisissatut siunnersuut, ataatsimiinnermi matumani oqaluuserisassani nr. 100-tut Naalakkersuisut saqqummiussaata innersuussutigissavara: ”Sanaartornermi neqerooruteqartitsisarneq pillugu Inatsisartut inatsisaata allanngortinneqarnera pillugu Inatsisartut inatsisissaattut siunnersuut”.

Inatsisissatut suliniummi tassani pisortat sanaartugassaataanni aammalu sanaartukkani pisortanit tapiiffigineqartuni unammilleqatigiinnermi sanasut suliffeqarfiutaat minnerusut saneqqutaanngikkarluarlugit, siunnersuuteqartup ilinniarfissanik amerlanerusunik pissarsiniarluni suliniutit annertunerulernissaannik kissaateqarnera tamakkiisumik naammassineqassasoq Naalakkersuisut qularinngilluinnarpaat.

Kiisalu Naalakkersuisut isumaqarput, inatsisissatut suliniutaasumi naalakkersuisooqatigiinnissamik isumaqatigiissummi inissiat amerlanerusut najukkani suliffeqarfinit sananeqartarnissaannik anguniagaqarneq naammassineqassasoq. Sanaartornermi inuiaqatigiit unammilligassaasa kalaallit suliffeqarfiutaasa – angisuut mikisullu – aqutsisuinik nunap iluaniititsiviusut sapinngisamik annertunerpaamik peqataatinneqarnerisigut aaqpinneqartassasut eqqarsaatigineqarpoq.